



Fréttatilkynning  
frá  
skrifstofu forseta Íslands

## HEIMSÓKN FORSETAHJÓNANNA TIL VESTURBYGGÐAR

Forseti Íslands Guðni Th. Jóhannesson og Eliza Reid forsetafrú hefja opinbera heimsókn til Vesturbyggðar að morgni mánudagsins 3. október næstkomandi. Heimsóknin stendur í tvo daga og munu forsetahjón heimsækja skóla, vinnustaði og stofnanir í bæjarfélaginu. Að kvöldi mánudagsins 3. október verður haldin fjölskylduhátíð í Félagsheimilinu á Patreksfirði og þangað er öllum íbúum sveitarfélagsins boðið.

Heimsókn forsetahjóna hefst í fundarsal bæjarskrifstofu Vesturbyggðar á Patreksfirði að morgni mánudagsins. Þar munu Ásthildur Sturludóttir bæjarstjóri og bæjarfulltrúar taka á móti þeim og kynna bæjarfélagið, fjölpætt viðfangsefni og framtíðarsýn. Þaðan liggur leiðin í útgerðar- og fiskvinnslufyrirtækið Odda þar sem Sigurður Viggósson framkvæmdastjóri segir frá starfseminni og forsetahjón drekka kaffi með starfsfólkinu. Eydís Þórsdóttir deildarstjóri tekur á móti forsetahjónum í útibúinu frá Fjölbrautaskóla Snæfellinga í Vesturbyggð ásamt um 20 nemendum skólans, sem þar stunda fjarnám, en Gústaf Gústafsson, skólastjóri Patreksskóla, fylgir síðan forsetahjónum í kennslustofur skólans og stýrir dagskrá á sal. Í kjölfarið liggur leið gestanna í leikskólann Araklett þar sem Helga Bjarnadóttir leikskólastjóri segir frá starfseminni og leikskólabörn syngja lag.

Eftir hádegi á mánudeginum 3. október liggur leiðin fyrst í Vélsmiðjuna Loga þar sem Barði Sæmundsson kynnir starfsemina. Þaðan verður haldið á Fiskmarkaðinn þar sem Hjörleifur Guðmundsson tekur á móti forsetahjónum. Þau munu síðan hitta eldri borgara á Patreksfirði í Selinu og heimsækja að því búnu Byggðasafnið að Hnjóti.

Á fjölskylduhátíðinni um kvöldið bjóða heimamenn til fjölþættrar dagskrár með tónlistarflutningi, leiklist og upplestri. Þar flytur forseti Íslands ávarp. Hátíðin hefst kl. 20:00 og eru allir velkomnir á hana; aðgangur er ókeypis.

Priðjudaginn 4. október halda forsetahjón til Bíldudals. Þau heimsækja fyrst Bíldudalsskóla þar sem Ásdís Snót Guðmundsdóttir skólastjóri, kennarar og nemendur bjóða til dagskrár. Þvínæst liggur leið forsetahjóna í fyrirtækið Arnarlax þar sem Kristian Matthíasson forstjóri kynnir starfsemina. Eftir hádegi verður Skrímslasetrið skoðað með leiðsögn Valdimars Gunnarssonar. Í Kalkþörungaverksmiðjunni tekur Einar Sveinn Ólafsson forstjóri á móti forsetahjónum en í Hafkalki kynnir Jörundur Garðarsson forstjóri framleiðsluna sem sækir hráefni til Kalkþörungaverksmiðjunnar. Heimsókninni til Bíldudals lýkur með samverustund forsetahjóna með eldri borgurum í Læk.

Hákon Ásgeirsson landvörður tekur á móti forsetahjónum í hinu nýja Surtarbrandssafni á Brjánslæk og þar býður kvenfélagið til kaffiveitinga með íbúum nærsveita. Jóhann Pétur Ágústsson bóndi og Halldóra Ragnarsdóttir á Brjánslæk kynna síðan forsetahjónum búskap sinn á Brjánslæk en opinberri heimsókn forsetahjóna til Vesturbyggðar lýkur að Vaðli á Barðaströnd þar sem tekið verður hús á þeim Hákonni Jónssyni og Þórunni Eggertsdóttur.

*30. september 2016*

*Nánari upplýsingar veita skrifstofa forseta Íslands (540 4400), Örnólfur Thorsson forsetaritari (896 3028), Árni Sigurjónsson skrifstofustjóri (820 4946) og Nanna Sjöfn Pétursdóttir (864 1424).*